

得見則不得不捕但當臨機殲滅之際固宜詳辨唐倭勿致混殺而已且邊將例聞賊船現形不計遠近或有妄動之時且只見一船四隣官兵全數抄殺非徒廢農外寇未至我軍先困今則詳察瞭望俾無遠追海外之事且諭于各道防備預措事言于備邊司○以朴素立為弘文館修撰李選為司諫院正言李墜為世子侍講院司書○夜東方南方西方如火氣

壬寅 上命召領議政尚震右議政李浚慶傳曰相位久闕今當朴相而大臣責任非輕苟非洽於上下之情者則固難堪任是故古有擢士為相之言也卿等毋拘常例十分擇薦因命史官往諭于瑞原府院君尹元衡曰卿曾經議政故并諭之矣元衡曰卜相國之大事臣雖曾經議政時在閑地勢難並參況臣累年告病未諳物情尤不可妄為之薦也尚震等以尹元衡洪暹沈通源卜相以啟答曰觀此卜相三人俱當但瑞原久病不出今難為重任須擇授不在職次久近予當徐量之

史臣曰大臣之任百責所萃苟非衆望所屬則國有用人之失